

Laluan LRT Masjid Jamek-Bandaraya kembali beroperasi



STESEN LRT laluan Masjid Jamek dan Bandaraya dibuka semula kepada orang ramai semalam.

KUALA LUMPUR – Sempena pembukaan semula laluan Transit Aliran Ringan (LRT) laluan Masjid Jamek dan Bandaraya bermula semalam, Rapid Rail Sdn. Bhd. (Rapid Rail) menyasarkan purata penggunaan harian sehingga 200,000 menjelang penghujung tahun ini.

Rapid Rail berkata, sasaran itu meningkat berbanding 155,000 sepanjang penutupan laluan di kedua-dua stesen itu sejak lebih setahun lalu.

Menurutnya, kekerapan tren pada waktu puncak kembali normal iaitu masa menunggu tiga minit bagi daerah pusat perniagaan (CBD) dan enam minit di luar daerah pusat perniagaan (non-CBD) dengan pengoperasian melibatkan 37 buah tren.

“Laluan antara Stesen Masjid Jamek dan Stesen Bandaraya ditutup sejak 27 Januari 2023 atas

faktor keselamatan disebabkan kerosakan struktur jejambat dan landasan berhampiran Stesen Bandaraya.

“Kerja-kerja membaik pulih kerosakan dimulakan pada 17 Mac 2023 melibatkan dua fasa.

“Ia merangkumi kerja-kerja menyokong jejambat di P163, P164 dan P165 serta mengembalikan struktur jejambat ke kedudukan asal,” katanya dalam kenyataan semalam.

Terdahulu, Menteri Pengangkutan, Anthony Loke Siew Fook meninjau kawasan kerosakan struktur yang terjejas sebelum ini sehingga menyebabkan laluan kedua-dua stesen tersebut ditutup.

Anthony seterusnya merasmikan pembukaan semula laluan stesen LRT tersebut bermula semalam.

Mengulas lanjut, Rapid Rail

berkata, proses membaik pulih telah selesai sepenuhnya pada 30 Disember lalu dan pemeriksaan serta pengesahan telah dilakukan oleh pihak jurutera perunding.

“Bagi mematuhi piawaian operasi, beberapa siri ujian dan pemantauan menyeluruh dilaksanakan bermula pada 1 Januari 2024 hingga kelmarin.

“Pembukaan semula laluan tersebut dibuat setelah mendapat kelulusan daripada Agensi Pengangkutan Awam Darat (APAD) berdasarkan kepada penilaian dan pemeriksaan yang dijalankan.

“Dengan pembukaan semula laluan ini, diharapkan pergerakan penumpang dipermudahkan, jumlah penumpang dapat ditingkatkan dan aktiviti ekonomi di sekitar laluan ini akan kembali rancak,” katanya.